

Sulat I Pablo Tun Ta Mga Taga Filipos

Una Basan

Tô lunsud ka Filipos isakup tun ta probinsya ka Macedonia tun ta banuwa ka Grecia. Dakál lunsud tô Filipos, asta igóddóan katô marapung mga sakup ka Roma.

Tô igdunggù si Pablo tun ta Macedonia, igulit-ulit sikandin tun ta mga taga Filipos. Purisu marapung tô igpamaké ki Jesu-Cristo. Tuu masarig tô kapamaké dan. Dakál tô ginawa dan ki Pablo, asta dakál tô ginawa i Pablo kandan. Marag sikandin igsadun tun ta Filipos, asta igtabang tô mga ágampamaké kandin.

Tô igdinág dan na igpriso si Pablo, igpapid dan tô kadumaan dan na si Epafrodito ébô tumabang kandin. Igpapid dan pagsik tô salapí ébô duwán magamit i Pablo.

Purisu igsulat si Pablo kandan ébô pasalamat tingód katô tabang dan kandin. Igtalan din kandan na kailangan pabákkárrán dan tô kapamaké dan ki Jesu-Cristo, asta kailangan ágakdayawan dan agad ágkahirapan dan. Igsulat din na kailangan liliyan dan tô mga taratinurù katô ánnà nángngà. Igpapanámdám din sikandan na igtábbus dan su igpasábbad dan tun ki Cristo, asta tô gó tô gasa na igbággé katô Manama tingód katô kapamaké dan, asta ánnà ukit katô katuman dan katô mga sugù asta mga ágkémun ka Judio.

1 ¹Ni sulat tikud kanak si Pablo, asta si Timoteo tô kadumaan ku. Mga ágsuguánnán ké i Jesu-Cristo. Ágpangumusta ké ákniyu diyan ta lunsud ka Filipos. Igsulatan ku tô langun yu na mga sakup ka Manama na igpasábbad tun ki Jesu-Cristo, tô mga tarapid ákniyu, asta tô mga manubù na ágtabang kandan tun ta lumu ka Manama.

²Mólà pa ka matanggap yu tô tabang asta tô kasunayan tikud tun ta Manama na Ámmà ta asta tikud tun ta Áglangngagán na si Jesu-Cristo.

Dasalán i Pablo tingód katô mga taga Filipos

³Atin ka ágsampátta ákniyu, ágpasalamatta katô Manama tingód ákniyu. ⁴Kada ágdasalla para ákniyu langun, duwán dayó ku.

⁵Ágpasalamatta katô Manama su tikud tun ta kapamaké yu sippang áknganni, sikiyu tô igtabang kanak tun ta kólit-ólit ku katô Madigár Gulitán. ⁶Igtigkanayan ka Manama tô madigár lumu din diyan ákniyu, asta isóddóran ku na panayunán din ni sippang ka lumónód si Jesu-Cristo. ⁷Nángngà gó tô dayó ku tingód ákniyu langun su ágginawaan ku gó sikiyu. Róggun igprisowa asta róggun igdapitta katô kabánnalan asta igpasóddorra na bánnal gó tô Madigár Gulitán, igtabang kó kanak tingód katô igpalumu ka Manama kanak ukit katô kédu din. ⁸Isóddóran ka Manama na tuuwa ágkabugaan ákniyu, su ágginawaan ku gó sikiyu magunawa katô kaginawa i Jesu-Cristo ákniyu.

⁹Ágdasalla gó para ákniyu na mólà pa ka kadugangan gó tô kapaginawaé yu ébô tuu yu kasóddóran asta tuu yu kagpáttan. ¹⁰Mólà pa ka kasóddóran yu ka ándin tô madigár ágkémun asta áglumun yu ébô malinis kó gó tun ta saruwan ka Manama asta ándà makabuyas ákniyu sippang ka lumónód si Cristo, ¹¹asta ébô ándà gó salà na áglumun yu ukit katô tabang i Jesu-Cristo ákniyu. Purisu pabantugán asta durungán gó tô Manama.

Tô dayó i Pablo

¹²Mga kataladi, kakalyag ku na kasóddóran yu na agad ándin tô inókitan ku, asal ikólit-ólitta pa. Agad igprisowa, asal tuu pa gó marapung tô igpaminág katô Madigár Gulitán, ¹³su tô langun sundalo na ágbanté katô palasyo katô emperador, asta tô langun ka duma mga manubù dini, isóddóran dan na igprisowa su igulit-ulitta katô Madigár Gulitán tingód ki Cristo. ¹⁴Tô karapungan ka mga kataladi, igmabákkár tô kasarig dan tun ta Áglangngagán ukit katô kapriso kanak, asta igmagani dan na gulit-ulit katô kagi ka Manama na ándà máddang.

¹⁵Agad duwán mga duma manubù na gulit-ulit tingód ki Cristo su ágkasabuan dan kanak asta gingà dan, asal duwán mga duma na gulit-ulit tingód ki Cristo su madigár tô kakalyag dan. ¹⁶Gulit-ulit dan su ágginaawaanna ikandan. Isóddóran dan na igpapidda dini ébô makataba a katô mga géllé katô Madigár Gulitán. ¹⁷Asal tô mga ágkasabuan kanak, agad gulit-ulit dan tingód ki Cristo, ánnà madigár tô ágdantulán dan. Ágpallayat-layat dan dád katô sarili dan. Kéman dan ka kadugangan tô madat na ágriyun ku dini ta prisowan ukit katô áglumun dan.

¹⁸Asal tógón din! Agad madigár ó madat tô ágdantulán dan, asal ágkadayawanna gó su mólit-ólit pa tô kabánnalan tingód ki Cristo.

Manayunna gó kadayawan, ¹⁹su isóddóran ku na ukit katô ákniyu mga kadasal asta ukit katô tabang katô Espiritu i Jesu-Cristo, madigár tô dungguán ku. ²⁰Tuu dakál tô kakalyag ku asta tô gimanan ku na diya gó kayyaan, asal iring katô inalayun áglumun ku, maganiya gó pabantug ki Cristo ukit katô áglumun ku, agad mantéya ó matéya.

²¹Kakalyag ku na róggun mantéya pa, si Cristo gó tō ágpabantugán ku. Atin ka matéya, tuu pa madigár su dumuma ad kandin. ²²Asal ka mantéya pa, duwán pa lumun ku na duwán ágpulusán. Ándà ku kasóddóri ka ándin tō tuu madigár para kanak. ²³Ilibug tō panámdám ku su kakalyag ku na tananan ku ni banuwa su tuu pa madigár ka dumuma a ki Cristo. ²⁴Asal tuu pa ágkailanganán ka mantéya pa ébō makatabangnga pa ákniyu. ²⁵Purisu isóddóran ku gó na mantéya pa asta manayunna dumuma ákniyu ébō tuu pa kumasarig asta kadayawan kó tingód katō kapamaké yu. ²⁶Atin ka makalónódda diyan ákniyu, tuu kó gó kadayawan tingód katō iglumu i Jesu-Cristo para kanak.

²⁷Na, agad ándin tō kókitan ku, kailangan nángngà tō ágkémun yu magunawa katō ágtinuruán tun ta Madigár Gulitán tingód ki Cristo ébō agad makasadunna ó diya makasadun diyan ákniyu, kadinággan ku na masarig tō kapamaké yu asta ágpasábbadé kó na ágpénagpát katō mga géllé asta gulit-ulit kó katō Madigár Gulitán ébō duwán mamaké. ²⁸Yakó gó ágkamáddangan katō mga manubù na gusig ákniyu. Atin ka di kó kamáddangan, ni gó tō pató ébō kasóddóran dan na supakan dan asta sikiyu tō tábbusán. Manama tō ágtikudan kani langun, ²⁹su tingód katō kakalyag ka Manama, igsalin kó ánnà dád ébō mamaké kó ki Cristo, asal igsalin kó ébō irrayatan kó pagsik tingód kandin. ³⁰Purisu ágtiisán yu tō kérrayat katō mga géllé ka Madigár Gulitán, iring katō inókitan ku na igkita yu dángngan, asta iring katō inókitan ku sippang áknganni na igdinág yu.

Tō kapabbabà i Cristo

2 ¹Na, ágpabákkárrán kód gó i Cristo, górorán kó ukit katō kaginawa din ákniyu, ágpasábbad tō Ugis Espiritu tun ákniyu, asta ágpaginawaé asta ágpéduwé kó. ²Purisu bággé kó kanak katō bánnal dayó ukit kani mga áglumun yu. Pénagpátte kó. Paginawaé kó. Pasábbadé kó tun ta ginawa asta tun ta panámdám.

³Agad ándin tō áglumun yu, yakó ágtingát, asta yakó ágpallayat-layat, asal pabbabà-babà kó baling, asta pabantug yu tō mga unawa yu sobra pa katō kapabantug yu katō ákniyu sarili. ⁴Yakó ágpapanámdám tingód dád katō ákniyu kadigárran, asal panámdám kó tingód ka kadigárran katō mga unawa yu.

⁵Kailangan magunawa tō panámdám yu katō panámdám i Jesu-Cristo.

⁶Agad Manama gó sikandin,
ándà din awidi tō kagunawa din katō Ámmà Manama,

⁷asal igtananan din tō kagunawa din
asta inéring sikandin na állang.

Igpamanubù sikandin asta ipamasusu.

⁸Tō igpamanubù sikandin, igpabbabà-babà sikandin

- ukit katô katuman din katô kakalyag katô Manama
 sippang ka kamatayan,
 agad ukit katô kamatayan tun ta krus.
- ⁹ Purisu tuu gó igpabantug ka Manama si Jesu-Cristo,
 asta igbággé ka Manama tun kandin tô ngadan na tuu pa mallayat
 ka tandingán katô langun ka duma mga ngadan,
- ¹⁰ ébô ka dinággán tô ngadan i Jesus, lumingkóód asta pabantug
 kandin tô langun,^a
 agad tun ta langit, ó nit tanà, ó tun ta siráb kani tanà,
- ¹¹ asta ébô tô langun kumagi na si Jesu-Cristo gó tô Áglangngagán.
 Purisu pabantugán tô Manama na Ámmà.

Iring ki na karani

¹² Purisu mga ágginawaan ku, su inalayun kó igtuman katô kakalyag ka Manama, ággár-ággárri yu tô nángngà áglumun katô mga manubù na igtábbus ka Manama tingód katô karespeto^b yu kandin. Ággár-ággárri yu ánnà dád róggun katô diyanna pa ákniyu, asal tuu pa gó áknganni agad ándà ad diyana ákniyu. ¹³ Makagaga kó tumuman su ágtabangan kó ka Manama na ágbággé ákniyu katô kakalyag asta makému ébô makatuman kó katô kakalyag din.

¹⁴ Agad ándin tô áglumun yu, yakó ágburáng-buráng asta yakó ágpapulé ¹⁵ ébô makita na malinis kó asta ándà salà yu na mga gabatà ka Manama, agad madat asta masalà-salà tô ágkémun katô duma mga manubù, su ágkitanán dan tô nángngà ágkémun yu iring na mga karani na ágséllà tun ta langit. ¹⁶ Pasóddór kó kandan na duwán kantayan na ándà ágtamanán na bággén ka Manama. Nángngà ni áglumun yu ébô tun ta kalónód i Cristo, duwán gó dayó ku su duwán ágpulusán katô linumuwan ku diyana ákniyu.

¹⁷ Atin ka matayanna, marus tô dipanug ku iring na bino na parusán asta bággén tun ta Manama. Su igpamaké kó asta igbággé kó katô sarili yu tun ta Manama, iring kó na mannap na matayan asta bággén tun ta Manama. Purisu duwán dayó ku su igbággé ku ni sarili ku tun ta Manama, asta kadayawanna duma ákniyu su igbággé yu tô sarili yu tun ta Manama. ¹⁸ Iring kani, duwán dayó yu su igbággé yu tô sarili yu tun ta Manama, asta kadayawan kó duma kanak su igbággé ku ni sarili ku tun ta Manama.

Si Timoteo asta si Epafrodito

¹⁹ Na, tô gimanan ku tun ta Áglangngagán na si Jesus na pasadunán ku si Timoteo diyana ákniyu ka dì dán madugé ébô kadayawanna ka ulitanna

^a 2:10 Ahaán tô Isaias 45:23 ^b 2:12 Karespeto, ó máddang.

ikandin tingód katô kóddô yu. ²⁰Sikandin tó pasadunán ku su ándà duma manubù iring kandin na tuu ágpanámdám tingód katô kadigárran yu.

²¹Tô duma mga manubù ágpanámdám dád tingód katô kandan kakalyag áglumun. Dì dan ágpanámdám tingód katô kakalyag na palumun i Jesu-Cristo kandan. ²²Asal isóddóran yu na ágkasarigan si Timoteo. Isóddóran yu na igtabang sikandin kanak na gulit-ulit katô Madigár Gulitán tingód ki Cristo, iring katô katabang ka batà katô kandin ámmà. ²³Gimanna na pasadunán ku sikandin diyan ákniyu ka kasóddóran ku ka ándin tó dungguán katô kaso ku. ²⁴Gimanna pagsik na tabanganna katô Áglangngagán ébô makasadunna diyan ákniyu ka dì dán madugé.

²⁵Igpanámdámma na kailangan pólián ku si Epafrodito diyan ákniyu. Sikandin tó kataladi ku asta igtabang kanak na ágtuman katô kakalyag ka Manama. Igdapit sikandin katô Madigár Gulitán iring na sundalo. Igpasadun yu sikandin dini ébô tumabang kanak tun ta kahirapan ku. ²⁶Pólián kud sikandin diyan ákniyu su ágkabugaan dán sikandin ákniyu langun, asta dì dán sikandin pakatónnók tingód katô tana din su ikadinág kó na ibógókan sikandin. ²⁷Ibógókan gó sikandin asta masig pád maté. Asal inéduwan tó Manama kandin, asta ándà sikandin kamaté. Inéduwan pagsik tó Manama kanak ébô makaliliya katô tuu pa dakál ranu.

²⁸Purisu masig kud pólián sikandin diyan ákniyu ébô ka kitanán yu puman sikandin, kadayawan kó, asta méwà tó tana ku. ²⁹Purisu tanggap yu sikandin na dakál tó dayó yu, iring na madigár áglumun ka mga sakup katô Áglangngagán. Pabantug yu sikandin asta tó langun manubù na iring kandin, ³⁰su masig pád sikandin inaté tingód katô katuman din katô kakalyag i Cristo. Agad isóddóran din na maté pád sikandin, asal kakalyag din na tumabang kanak, su sikiyu dì makagaga tumabang.

Tô manubù na tanggapán ka Manama

3 ¹Na, mga kataladi ku, mólà pa ka kadayawan kó su igpasakup kó tun ta Áglangngagán! Diya ágkabállé agad umanán ku tó kasulat ku kani, su kakalyag ku na dì kó kadattan.

²Banté kó katô mga Judio na áglumu ka madat. Iring dan na madat mga asu, su mirit dan pád ákniyu na patupu kó ébô tanggapán kó ka Manama. ³Asal sikita gó baling tó duwán mga pató na bánnal ki mga sakup katô Manama agad ándà tupuwi tó langun ta, su ágpangadap ki katô Manama ukít katô tabang ka Ugis Espiritu, asta ágkadayawan ki su igpasábbad ki tun ki Jesu-Cristo, asta isóddóran ta na dì ki tanggapán ka Manama ukít katô kapatupu ta.

⁴Atin ka matábbus ki tingód katô lawa ta asta linumuwan ta, duwán gó gunayan ku kumagi na sobra a pa ka tandingán katô duma mga manubù.

⁵Tô ikawalu álló tikud tun ta kapamasusu kanak, igtupuwanna gó.

Sakán tô sábbad rubbad i Israel, asta sábbadda sakup katô mga rubbad i Benjamin. Sábbadda Judio.^c Tuuwa gó igtuman katô mga sugù i Moises^d su igpasakuppa tun ta mga Pariseo. ⁶Su malóggódda igtuman katô mga sugù, igirrayatan ku pa tô mga ágpamaké ki Cristo. Asta tingód katô katuman ku ka mga sugù ébô tanggapánna ka Manama na nángngà tun ta saruwan din, ándà ágkasawé kanak.

⁷Tô langun kani na igpanámdám ku dángngan na duwán ágpulusán ku, ándà dán ágpulusán áknganni, su kakalyag kud na pasábbadda tun ki Cristo. ⁸Isóddóran kud gó na ándà palang ágpulusán katô langun ka tandingán katô kapasábbad ku ki Jesu-Cristo na Áglangngagán ku. Iring dád na ussu tô langun igсарigan ku dángngan. Purisu igtananan kud tô langun ébô pasábbadda tun ki Cristo, ⁹asta ébô masakuppa gó tun kandin. Ándà a tanggapi ka Manama na nángngà tun ta saruwan din ukit katô katuman ku katô mga sugù, asal igtanggappa gó katô Manama na nángngà ukit dád katô kapamaké ku ki Cristo, su ukit dád katô kapamaké ta tô katanggap ka Manama áknita na nángngà tun ta saruwan din. ¹⁰Kakalyag ku na pasábbadda tun ki Cristo asta kasóddóran ku tô katulusan din magunawa katô iggamit ka Manama tô iganté din puman si Cristo. Kakalyag ku na kókitan ku tô kahirapan na magunawa katô kahirapan i Cristo. Kakalyag ku na méringnga kandin agad matayanna magunawa katô kamatayan i Cristo para kanak, ¹¹su kakalyag ku na anténna puman ikandin.

Panayun kó ugtun katô ganti

¹²Ándà a kagi na ikéringngad ki Cristo. Ándà ku pa katuman tô langun katô kakalyag din kanak. Asal gággár-ággárра ébô tuuwa makéring ki Cristo, su igsalinna i Jesu-Cristo ébô makéringnga kandin. ¹³Mga kataladi, ándà a panámdám na ikéringngad ki Cristo. Asal sábbad dád tô gugtunán ku, su diyad gó ágpanámdám tingód katô iglumu ku, asal gággár-ággárра ébô ugtunán ku tô kakalyag ku. ¹⁴Inalayunna gággár-ággár sippang ka dumunggù a tun ta ágtamanán ébô tanggapán ku tô ganti ka Manama na igtawar kanak tun ta langit ukit ki Jesu-Cristo.

¹⁵Purisu iring pád kani tô panámdám katô langun ta na ágsunnad dán é kapamaké. Asal ka ánnà magunawa tô panámdám yu tingód kani, pénagpáttán kó katô Manama. ¹⁶Asal kailangan tumanán ta gó tô kabánnalan na igpasóddór dán katô Manama áknita.

¹⁷Na, mga kataladi, iringi yu gó tô ágkémun ku, asta sállág yu tô ágkémun katô mga manubù na igiring áknami ébô duwán iringan

^c 3:5a Judio, ó Hebreo. ^d 3:5b Manama tô igbággé katô mga sugù ki Moises, asta si Moises tô igbággé katô mga sugù tun ta mga rubbad i Israel. Purisu ágtawarán katô mga rubbad i Israel na mga sugù i Moises.

yu. ¹⁸Su marapung tō mga mà kagi igpamaké ki Cristo, asal ukit katō madat linumuwan dan, ágpasóddór dan na gusig dan katō ágtinuruán tingód katō kamatayan i Cristo tun ta krus. Ikapira ad igulit ákniyu tingód kani mga manubù ni, asta igsággówa róggun katō kapasampát ku puman kani ákniyu. ¹⁹Asal matuman dan gó supakan ka Manama, su agad ándin tō kakalyag katō lawa dan, tō gó tō ágtumanán dan. Agad kailangan kayyaan dan tingód katō madat mga linumuwan dan, asal ágpadadurung dan baling. Ágpanámdámmán dan dád tō tingód katō kóddô dan nit banuwa. ²⁰Asal sikita gó tō mga sakup tun ta pagpangulu ka Manama tun ta langit na tikudan katō Taratábbus ta. Gangatan ta tō Áglangngagán na si Jesu-Cristo. ²¹Ukit katō katulusan din, pamantun din ni lawa ta na ágkamaté ébô tō lawa ta méring katō tuu madigár lawa din na di maté. Magunawa tō katulusan na gamitán din ka talun din tō langun agad ánda.

Mga ágtinuruán

4 ¹Purisu mga kataladi ku na ágginawaan ku, pasarig kó katō kapamaké yu tun ta Áglangngagán. Ágkabugaan ad ákniyu, su sikiyu tō ágbággé kanak ka dayó, asta sikiyu tō pató na duwán ágpulusán katō linumuwan ku.

²Ágpédu-éduwa ákniyu Euodia asta Sintique na kailangan pasábbadé kó, su mga sakup kó katō Áglangngagán. ³Ágpédu-éduwa pagsik ákniyo na ágkasarigan rarak ku na tabangan nu ni duwa gabayi ébô pasábbadé dan, su sikandan tō kadumaan ku na gulit-ulit katō Madigár Gulitán, asta sikandan tō kadumaan i Clemente asta tō duma mga kadumaan ku na igsulat dán tō mga ngadan dan tun ta libro ka kantayan na ándà ágtamanán.

⁴Kailangan inalayun kó gó kadayawan tingód katō kapasakup yu tun ta Áglangngagán. Umanán ku tō igkagi ku, na kailangan kadayawan kó gó!

⁵Pakita yu tun ta langun manubù na mallayat tō ginawa yu. Masig dán tō kalónód katō Áglangngagán. ⁶Agad ándin tō dumunggù tun ákniyu, yakó gó ágkatanaan, asal dasal kó tun ta Manama tingód katō langun. Ulit yu kandin tō mga ágkailanganán yu, pamuyù kó katō tabang din, asta pasalamat kó kandin. ⁷Atin ka lumun yu ni, bággayan kó katō Manama ka kasunayan ébô ándà palang tana yu. Masuné kó su ágsarig kó ki Jesu-Cristo. Tō kasunayan na tikud tun ta Manama di yu tuu ágkagpáttan su tuu gó madigár.

⁸Na, mga kataladi, duwán pa sábbad kagin ku ákniyu. Panámdám yu dád gó tō mga bánnal, tō mga ágkabantug, tō mga nángngà, tō mga

^e 4:5 Masig dán tō kalónód katō Áglangngagán, ó madani gó tō Áglangngagán tun ákniyu.

malinis, tō mga ágbággé ka dayó, asta tō mga madigár ágdinággán. Agad ándin tō mga madigár, asta agad ándin tō mga ágkadurung, panámdám yu ni. ⁹Tuman yu tō langun na igtinurù ku ákniyu, tō mga kabánnalan na igtanggap yu asta tō igpaminág yu tikud kanak. Agad ándin tō linumuwan ku na igkita yu, tō gó tō kailangan lumun yu, asta dumaan kó gó katō Manama na ágbággé ka kasunayan.

Kapasalamat tingód katō tabang

¹⁰Dakál gó tō dayó ku asta ágpasalamatta katō Áglangngagán su igpasóddór yu puman na igginawaanna ikiyu. Isóddóran ku na agad duwán kakalyag yu na tumabang kanak, asal ándà dád timpo para katō katabang yu. ¹¹Yakó ágpanámdám na igkagiya kani su ikulanganna, su agad ándin tō kóddô ku, isóddóran ku na nángngà gó para kanak. ¹²Isóddóran ku na nángngà para kanak agad ágkandaanna, asta nángngà para kanak agad ágkaduwánnanna. Isóddóran ku na nángngà tō kóddô ku agad ándin. Nángngà kanak agad ágkabássugga ó agad ágballusánna. Nángngà kanak agad duwán dakál ó agad ikulanganna. ¹³Agad ándin tō dumunggù kanak, makatiissa katō langun ukit katō tabang i Cristo na ágpabákkár kanak. ¹⁴Asal madigár tō tabang yu kanak áknganni su ihirapanna gó.

¹⁵Sikiyu na mga taga Filipos, isóddóran yu na tō igpanówa tikud tun ta probinsya ka Macedonia asta tō igtigkanéya igulit-ulit katō Madigár Gulitán tun ákniyu, sikiyu dád gó tō mga ágpampamaké na igpapid ka tabang para kanak ébô makatinurù a katō duma mga manubù iring katō katinurù ku ákniyu. ¹⁶Agad dutunna ta lunsud ka Tesalonica, asal ikapira kó igpapid katō tabang yu para kanak. ¹⁷Yakó ágpanámdám na duwán kakalyag ku na tumabang kó puman kanak, asal kakalyag ku na duwán matanggap yu tikud tun ta Manama tingód katō kabággé yu kanak.

¹⁸Áknganni ándà a kakulangi su itanggap kud tō dakál tabang yu kanak, asta duwán pa sobra katō ágkailanganán ku su itanggap kud tō tabang na igpapid yu kanak ukit ki Epafrodito. Nángngà tun ta Manama tō tabang yu asta ágkadayawan sikandin, su tō gasa yu kanak iring na mambut na ágbággén tun ta Manama. ¹⁹Na, tō Manama na ágdóppón kanak tō mággé ákniyu katō langun na ágkailanganán yu su ñi katáppángngan tō dakál ginawa din na ágbággén din áknita ukit ki Jesu-Cristo. ²⁰Purisu durungán ta tō Manama na Ámmà ta ka ándà ágtamanán. Matuman gó ni!

Ágtamanán kani sulat

²¹Ágpangumusta a katō langun sakup ka Manama na ágpamaké ki Jesu-Cristo. Tō mga kataladi na igduma kanak dini, ágpangumusta dan ákniyu. ²²Ágpangumusta ákniyu tō langun sakup ka Manama dini, asta tuu pa gó tō mga taralumu tun ta palasyo katō emperador.

²³Mólà pa ka tabangan kó katō Áglangngagán na si Jesu-Cristo.